

11. gr.

Lögregluáðstoð.

Umhverfissvið getur ef þörf krefur leitað atbeina lögreglu við að framfylgja samþykkt þessari og ákvörðunum teknum á grundvelli hennar.

12. gr.

Refsiviðurlög.

Um brot á samþykkt þessari skal fara samkvæmt ákvæðum laga nr. 7/1998 um hollustuhætti og mengunarvarnir.

13. gr.

Lagagrundvöllur.

Samþykkt þessi staðfestist hér með skv. 25. gr. laga nr. 7/1998 um hollustuhætti og mengunarvarnir, með síðari breytingum og öðlast gildi þegar við birtingu og fellur þá úr gildi samþykkt um kattahald í Reykjavík nr. 622/1999.

14. gr.

Ákvæði til bráðabirgða.

Ákvæði 9. gr. er varða ómerkta ketti taka gildi þrem mánuðum eftir gildistöku samþykktarinnar.

Umhverfisráðuneytinu, 23. ágúst 2005.

F. h. r.

Ingimar Sigurðsson.

Sigurbjörg Sæmundsdóttir.

SAMÞYKKT**um kattahald á Fljótsdalshéraði.**

1. gr.

Kattahald á Fljótsdalshéraði sætir þeim takmörkunum sem á er kveðið í þessari samþykkt. Samkvæmt lögum um dýravernd nr. 15/1994 fer Umhverfisstofnun með mál er varða dýravernd.

2. gr.

Stjórnsýsla.

Sveitarstjórn fer með umsýslu vegna samþykktar þessarar og getur ráðið sérstaka dýraeftirlitsmenn eða falið starfsmönnum sveitarfélagsins hlutverk dýraeftirlitsmanns. Þeir starfa í umboði heilbrigðisnefndar Austurlands.

3. gr.

Um kattahald í dreifbýli.

Kattahald í dreifbýli sætir að öllu jöfnu ekki takmörkunum. Þó getur sveitarstjórn, telji hún og héraðsdýralæknir brýna þörf á, takmarkað kattahald í dreifbýli.

4. gr.

Skilyrði fyrir kattahaldi í þéttbýli.

Þéttbýli er skilgreint sem: Þyrping húsa þar sem búa a.m.k. 50 manns og fjarlægð milli húsa fer að jafnaði ekki yfir 200 metra, sbr. skipulags- og byggingarlög nr. 73/1997 með síðari breytingum.

Sveitarstjórn er heimilt að veita lögráða einstaklingum, sem búa í þéttbýli í sveitarfélaginu leyfi til kattahalds með ákveðnum skilyrðum. Leyfið er bundið við nafn og heimilisfang viðkomandi og er ekki framseljanlegt. Leyfið er einnig bundið við þann kött sem það er gefið út fyrir.

Sveitarstjórn skal halda skrá yfir ketti sem veitt er leyfi fyrir, þar sem fram koma upplýsingar um köttinn og eiganda hans. Skráin skal vera aðgengileg heilbrigðiseftirliti og dýraeftirlitsmanni, sé hann starfandi.

- a) Um kattahald í fjöleignarhúsum fer að 13. tl. A-liðar 41. gr. laga nr. 26/1994 um fjöleignarhús. Þ.e. til að halda kött í fjöleignarhúsi þarf samþykki allra eigenda. Þegar hús skiptist í aðgreinda hluta nægir samþykki þeirra eigenda sem hafa sameiginlegan inngang, stigagang eða annað sameiginlegt húsrými. Óheimilt er þó að halda ketti í fjöleignarhúsum ef kattahaldið sannanlega veldur eða viðheldur sjúk-dómum hjá íbúum.
- b) Köttur sem færður er til skráningar skal vera merktur varanlega með húðflúri eða örmerki skv. reglugerð um aðbúnað og umhirðu gæludýra og dýrahald í atvinnuskyni nr. 1077/2004. Eigandi kattarins skal strax að lokinni örmerkingu koma upplýsingum um númer örmerkis og nafn og kennitölu eiganda til sveitarstjórnar.
- c) Leyfisgjald fyrir kattahaldi skal greiða árlega til sveitarsjóðs, eftir gjaldskrá sem sveitarstjórn setur að fenginni umsögn Heilbrigðiseftirlits Austurlands samkvæmt ákvæðum 25. gr. laga nr. 7/1998 um hollustuhætti og mengunarvarnir, með síðari breytingum. Gjaldið skal ekki vera hærra en sem nemur rökstuddum kostnaði fyrir veitta þjónustu og eftirlit og skal birt í B-deild Stjórnartíðinda. Gjaldið skal greitt í fyrsta sinn við skráningu kattarins, og síðan árlega fyrirfram, fyrir lok febrúar ár hvert. Hafi gjaldið ekki verið greitt innan tveggja mánaða frá gjalddaga fellur leyfið sjálfkrafa úr gildi. Innifalið í skráningargjaldinu er ábyrgðartrygging. Eigandi dýrs ber kostnað af merkingu dýrsins, hreinsun o.þ.h. Við greiðslu leyfisgjalds ber leyfishafa að framvísa vottorði dýralæknis um að kötturinn hafi á undangengnum 12 mánuðum verið hreinsaður af spóluormum sem og gögn um örmerkingu dýrsins.
- d) Auk örmerkis skulu kettir bera hálsól með upplýsingum um heimilisfang eiganda og símanúmer.
- e) Óheimilt er að láta kött dvelja lengur en þrjá mánuði á heimili án þess að sótt sé um leyfi fyrir honum.
- f) Ekki er leyfilegt að hafa fleiri en tvo ketti eldri en þriggja mánaða á sama heimilinu.
- g) Gelda skal alla fressketti sex mánaða og eldri sem ganga lausir utandyra.
- h) Leyfishöfum ber að taka tillit til fuglalífs á varptíma t.d. með því að hengja bjöllur á hálsólar og halda köttum sínum innandyra að nóttu til á tímabilinu 1. maí til 30. júní.
- i) Leyfishafa ber að hafa sandkassa fyrir köttinn á sinni lóð.

5. gr.

Óheimilir staðir.

Ekki má hleypa köttum inn í húsrými eða á lóðir sem fjallað er um fylgiskjali 3 með reglugerð um hollustuhætti nr. 941/2002 né heldur húsnæði þar sem matvæli eru meðhöndluð.

Slíkir staðir eru m.a. eftirfarandi skv. ákvæðum í fylgiskjali 3 með reglugerð um hollustuhætti nr. 941/2002:

Heilbrigðis- og meðferðarstofnanir.

Skólar.

Lækna- og tannlæknastofur.

Sjúkrahús og aðgerðarstofur.

Vistarverur handtekinna manna.

Heilsuræktarstöðvar.

Íþróttastöðvar og íþróttahús.

Gæsluvellir.

Snyrtistofur.

Nuddstofur og sjúkrahjálfun.

Sólbaðsstofur.

Húðflúrsstofur.

Samkomuhús, s.s. kirkjur, leikhús, hljómleikasalir, söfn og kvikmyndahús.

Gististaðir.

Veitingastaðir.

Sumarbúðir fyrir börn.

Um matvælafyrirtæki fer samkvæmt ákvæðum reglugerðar um matvælaeftirlit og hollustuhætti við framleiðslu og dreifingu matvæla.

6. gr.

Ónæði og óþrif af völdum katta.

Eiganda kattar ber að sjá svo um að köttur hans valdi ekki hávaða, ónæði, óþrifnaði né óhollustu.

Ef köttur veldur nágrönnum eða öðrum ítrekuðu ónæði, óþrifum eða tjóni, þá ber eiganda eða forráðamanni að leita leiða til að koma í veg fyrir slíkt.

7. gr.

Handsömun katta.

Sveitarstjórn er heimilt að láta veiða ketti í búr að höfðu samráði við Heilbrigðiseftirlit Austurlands í eftirfarandi tilfellum:

- a) sé köttur ómerktur, hvort sem er með hálsól eða örmerki.
- b) Sé ítrekað kvartað undan ágangi katta á tilteknu svæði.
- c) Sé köttur innandyra hjá nágranna í leyfisleysi, á óheimilum stað eða án samþykkis í fjöleignarhúsi.

Meiriháttar föngun villikatta í þéttbýliskjörnum skal auglýsa með a.m.k. viku fyrirvara með tilmælum um að heimilisköttum sé haldið innandyra.

Ketti sem fangaðir eru skv. a-lið hér að ofan og ketti sem haldnir eru í fjöleignarhúsum án samþykkis meðeigenda/íbúa, sbr. 4. gr., a-lið skal færa í sérstaka kattageymslu, sem hefur leyfi heilbrigðiseftirlits skv. hollustuháttareglugerð nr. 941/2002 og Umhverfisstofnunar. Öðrum köttum skal sleppa lausum en eigendum eða umráðamönnum katta tilkynnt um handsömunina og ástæður hennar. Ítrekuð handsömun á ketti vegna ónæðis telst brot á 6. gr. samþykktarinnar og getur heilbrigðisnefnd Austurlands bannað viðkomandi eiganda eða umráðamanni að halda kött í lögsagnarumdæmi nefndarinnar. Köttur sem ítrekað hefur verið handsamaður skal færður í kattageymslu.

Tilkynna skal eiganda ef merktir kettir eru teknir úr umferð. Eigandi kattar sem fluttur er í kattageymslu skal greiða handsömunar-, fóður- og vistunargjald skv. gjaldskrá um katta-

hald í viðkomandi sveitarfélagi áður en hann er afhentur á ný. Sé köttur ekki örmerktur skal eigandi hans greiða fyrir örmerkingu kattarins áður en hann er afhentur og fær gegn því beiðni sem nýta má hjá dýralækni til greiðslu fyrir örmerkingu. Ef kattareigandi vitjar ekki kattarinn innan viku, er heimilt að farga kettinum án frekari fyrirvara. Kattareigandi ber allan kostnað af handsömun, vörslu, fóðrun og aflífun, ef til þess kemur.

Ef ekki er unnt að bera kennsl á kött með örmerki eða með merkingu á ól skal auglýsa eftir eiganda hans. Gefi eigandi sig ekki fram innan sjö sólarhringa frá birtingu auglýsingar er lögreglu eða dýraeftirlitsmanni heimilt að láta lóga viðkomandi ketti án frekari fyrirvara.

8. gr.

Refsiviðurlög.

Með brot á samþykkt þessari skal fara samkvæmt ákvæðum laga nr. 7/1998 um hollustuhætti og mengunarvarnir með síðari breytingum.

Við minniháttar brot á samþykkt þessari skal eigandi kattarins sæta skriflegri áminningu. Endurtekin eða alvarleg brot geta leitt til leyfissviptingar.

Leyfishafa er skylt að greiða kostnað sem leiðir af brotum á samþykkt þessari.

9. gr.

Lagagrundvöllur.

Samþykkt þessi staðfestist hér með skv. ákvæðum 25. gr. laga nr. 7/1998 um hollustuhætti og mengunarvarnir með síðari breytingum og öðlast gildi þegar við birtingu. Jafnframt falla þá úr gildi eldri samþykktir um kattahald í sveitarfélaginu.

Ákvæði til bráðabirgða.

Þeir sem halda ketti við gildistöku samþykktarinnar, en hafa ekki skráð þá, skulu færa þá til skráningar samkvæmt samþykkt þessari innan þriggja mánaða.

Umhverfisráðuneytinu, 22. ágúst 2005.

F. h. r.

Ingimar Sigurðsson.

Sigurbjörg Sæmundsdóttir.

AUGLÝSING

um umferð í Stykkishólmi.

Samkvæmt heimild í 81. gr. umferðarlaga nr. 50/1987 og að fenginni tillögu bæjarstjórnar Stykkishólmsbæjar hefur eftirfarandi verið ákveðið:

1. Frá gatnamótum Skólastígs og Silfurgötu er einstefna um Skólastíg til norðurs að gatnamótum Höfðagötu og Skólastígs.
2. Akstur hópferðabifreiða er bannaður inn á Höfðagötu að norðanverðu frá Skólastíg.

Reglur þessar taka gildi við birtingu þeirra.

Sýslumaður Snæfellinga, 24. ágúst 2005.

Ólafur K. Ólafsson.